

Communicaziun a las medias dal cussegl dal public SRG.R

Votaziuns federalas 2015 – Rapports da RTR equilibrads ed objectivs

Cuira, ils 18-11-2015 – **A chaschun da sia ultima sesida è il cussegl dal public SRG.R (CP SRG.R) s'occupà cun ils rapports da Radiotelevisiun Svizra Rumantscha (RTR) davart las votaziuns federalas 2015 ed ils bulletins da novitads.**

En ses rapport fa la cumissiun ina bilantscha fitg positiva da las contribuziuns realisadas avant las votaziuns federalas. Ils rapports èn stads equilibrads ed objectivs. Medemamain persvadì han las emissiuns durant la dumengia da votaziun dals 18 d'october. L'offerta da RTR è stada cumpletta e senza concorrenza. En spezial l'offerta online cun il dossier spezial è stada detagliada e fitg survesaivla. Attenziun speziala ha RTR era fatg a las atgnadads regiunalas e chantunalas en il Grischun. Quai dentant senza tralaschar quai ch'è succedì politicamain en l'ulteriura Svizra.

Promover dapli ils chanals da social media

La redacziun da giuventetgna «Battaporta» ha fatg intervistas frestgas e luccas e preschentà uschia las candidatas ed ils candidats da las partidas giuvnas. Il CP SRG.R beneventass dentant, sch'ils chanals da social media vegnissan optimads ed integrads anc pli fitg. Ultra da quai è il project «Politbox» vegnì reducì memia fitg sin l'app da la SSR, ed uschia è l'offerta supplementara fitg multifara vegnida in pau a la curta. Cumpareglià cun las emissiuns «Wahlfart» e «Wähler gesucht» da SRF èn las singulas emissiuns da RTR stadas plitost tradiziunalas e pli pauc innovativas. Per finir po vegnir constatà che l'offerta da RTR è stada fitg extendida e quasi cumpletta.

Bulletins da novitads dal Radio Rumantsch

Il cussegl dal public SRG.R ha ultra da quai era prendì sut la marella ils bulletins da novitads dal Radio Rumantsch areguard lingua, dicziun, preschentaziun e stil. Leger rumantsch grischun chaschuna fadia als pli paucs preschentaders da novitads. Era la pronunzia clera e bain chapibla da la pli part dals preschentaders è vegnida validada sco positiva. Gist tar las novitads è il CP SRG.R plinavant da l'opiniun che la scolaziun e furmaziun dals collavuradors en ils secturs da la lingua e dal discurren meritia attenziun speziala.

Perspectiva

A chaschun da la seduta dal favrer 2016 s'occupa il CP SRG.R cun las emissiuns da musica «Las Perlas», «Soundcheck» e «La Classica».

Questas emissiuns vegnan emessas mintgamai il venderdi, la sonda e la dumengia tranter las 19.00 e las 20.00 en il Radio Rumantsch.

Augustin Beeli è sa retratg sco commember dal CP SRG.R per la fin dal 2015. Sia successura ubain ses successur vegn elegì a chaschun da la radunanza generala da la SRG SSR Svizra Rumantscha ils 21 da matg 2016 a Cuira.

Infurmaziuns davart il cussegl dal public SRG.R

Il cussegl dal public è in gremi consultativ independent che accumpogna la lavur ed il svilup da program da Radiotelevision Svizra Rumantscha (RTR) cun constataziuns e propostas. Il cussegl dal public sa raduna per regla quatter giadas l'onn. El observa ina tscherna da programs, emissiuns e purschidas online da RTR. Il cussegl dal public SRG.R s'engascha per in stretg contact tranter las personas responsablas per il program ed il public. El sa cumpona da 15 commembras e commembers.

En cas da dumondas u per ulteriuras infurmaziuns:

Michael Spescha, president dal cussegl dal public SRG.R, telefonin 079 486 58 47

Anna Maria Ratti, secretariat SRG.R, telefon 081 255 79 79